

小基督

至 koân 上主 ê 聖神臨到我；因為上主用油抹我，hō 我傳福音 hō sàⁿ-chhiah ê 人，差我醫好傷心 ê 人，宣揚受掠 ê 得 tiòh tháu 放，受關 ê 出監牢。（《全民台語聖經》以賽亞書 61：1）

有一個安歇日，tī 祂 ê 家鄉拿撒勒，tú á tī 祂開始公開宣教無 gōa 久，耶穌行去會堂敬拜。會堂 ê 領導者叫祂讀聖卷，祂 tòh 掀到以賽亞書 61 章 ê 頭幾節。祂讀了，然後實際上講：「今 á 日你有通過我 ê 一生，見證 chiah-ê 話 ê 實現。」

以賽亞書 chiah-ê 話總結基督宣教 ê 要點，m̄-koh，真 chē 基督徒真 oh tit 接受 hiah-ê 事實。

基督徒 ê 意思之一是「小基督」。當咱承認基督做咱 ê 救主 ê 時，咱向世人宣告講：「我 beh 跟 tòe 基督，我 beh 盡量效法祂 ê 言行。通過上帝聖神 ê 權柄，我 beh 成做一個小基督。」

咱真 chē 人偏離對受壓迫 ê、受迫害 ê、孤單 ê、被關監 ê kah 病人 ê 承諾。M̄-koh，若是咱自稱是「小基督」，án-ne，咱 tòh bē-tàng 起造一個繭（kián）kā 家己包起來，koh 獻出咱 ê 一生來關照咱家己，á 是咱至親 ê 家屬 ê 需要。基督叫咱 tiòh 伸手幫助 hiah-ê 有需要 ê 人。

Siōng 富裕 ê 美國家庭 kah in 需要幫助 ê 厝邊，á 是 kah 世界其它地區 hiah-ê 每工生活費用比一 khok 美金 hah 少 ê 人之間，有一個鴻溝存在。雖然上帝疼 in kah 疼咱平 chē，m̄-koh，當咱無看 tiòh in ê 困境 ê 時，in 會感覺受棄 sak，而且有時會 tī 怨恨中來對抗咱。

咱真 oh tit 接受 chit-ê 真相，m̄-koh，若是咱自稱是基督徒，是「小基督」，án-ne，咱 tiòh 必須承認咱有 tùi 基督承接 chit-ê 事工。咱 kah 祂全款，有受上帝聖神 ê 抹油，來分擔祂 ê 工作。

祈禱：上主 ah，求祢擴展我 ê 心 kah 腦，thang koh khah 接近基督來活。求祢加強我 ê 力量，來保持 kah 聖神同在，án-ne，萬權能 ê 上帝—宇宙 ê 創造者 tòh 會帶來喜樂、幸福 kah 光進入我 ê 性命，然後通過我進入我身邊 ê 人 ê 性命。我奉耶穌 ê 名祈禱。阿們。

（2002.01.06）